

Señora Nuhad Mansur: UN BON EHEMPLO TRAS DI UN GRAN HOMBER SEMPER TIN UN GRAN MUHER

"Tras di un gran homber semper tin un gran muher" un sabio refran ta bisa, y den historia di mundo tin hopi caso cu por mustra esaki. Nombenan manera Josefina, Manuelita, Indira, Evita, ta forma parti di e nombenan di hende muher cu ta refleho puro di dicho refran. Na Aruba tambe esey ta e caso, y hopi cerca di nos, den DIARIO mes, nos tin señora Nuhad Mansur cu ta e motor tras di su casa, nos director Jossy Mansur.

For di tempo cu señora Mansur tabata un mucha di apenas 10 año di edad e tabata gusta lesa buki pa amplia su conocimientonan. Pero desde su edad chiquito ey e tabata gusta profundiza y pesey e literatura cu semper el a scoge pa lesa tabata clasico y no "novelita rose". Destino e pone casa cu un escritor, y for di cuminzamen-

to di nan matrimonio sra. Nuhad tabata yuda Jossy type su novelanan, y dune tambe su opinion.

"Como cu mi ta ripara cu Jossy ta skirbi asina profundo y cu hopi vision, un dia mi a puntre pakico e no ta manda articulonan pa NOBO. Esey el a haci, y surpasando nos propio expectativa esey a bay cu hopi éxito.

EXTRA

Tempo despues Eddy Oleana (q.e.p.d) a acerca Jossy pe bira coresponsal di EXTRA na Aruba, loke el a acepta. Asina nan a cuminza cu EXTRA den e garashi di nos cas, na Sweelinckstraat unda cu yuda pa Ruth Maduro, casa di e recordado Julio Maduro, Jossy, ami y Julio mes nos a cuminza cu EXTRA".

"Jossy mes tabata parti EXTRA, y asina nos a cuminza haya tantísimo abonado cu nos mes a keda sorprendi. Tur hende den pueblo tabata gusta e articulonan di Jossy, y EXTRA a yega te 6000 (seis mil) ehemplar. Ya e tempo ey

nos a muda pa un oficina chiquito".

Sra. Mansur tambe tabata skirbi e tempo ey, ya cu e tin un mente curioso y hopi critico pa analiza situacionnan.

Sra. Mansur ta indica cu na dado momento el a mira cu cada vez cu nan trahadornan tabata manda algo pa Curacao (pasobra EXTRA tabata tin 4 pagina pa Aruba so), nan no tabata worde publica.

"Mi tabata wak e frustracion den e cara di nos empleadonan, y despues di varios año cu EXTRA tabata asina halto den circulacion. Ningun otro corant di Antiyas cu tabata circula na Aruba a yega na seis pa siete mil ehemplar manera EXTRA. Ora di mira e frustracion di nos empleadonan y di Jossy cu ora e tabata manda un editorial y nan no ta pone, mi di cu Jossy "Bo sa Jossy ya a bira tempo pa Aruba tin su propio corant".

DIARIO

"Jossy di cu mi si, pero un imprenta asina ta costa hopi placa. Mi di, no worry Dios ta yuda. Ban fia foi banco.

E tempo ey Jossy su tata a regala cada yiu un bonus di pasco y cu e placa cu Jossy a ricibi nos a bay Merca.

Na Merca nos a busca un lugar cu ta vende machine. Nos a bay sin sa absolutamente nada di machine. E doño a vende nos machinnan bieu, pero cu si a wanta diez año. Nos a cumpra nan, y danki na Caribbean Mercantile Bank cu a deposita su confianza den nos y tabata tin pasenshi cu nos, pasobra tur cuminzamento ta dificil, nos a lanta DIARIO".

Na e momentonan ey EXTRA tabata den man di famia Mansur ainda, y kico a sosode despues, sra. Mansur ta splica.

"E tempo ey Toko Winklaar trahando cu nos tras di nos lomba el a bay Curacao pa kita EXTRA for di nos. Pero kico nos a haci?. Nos a haci un yamado na pueblo pa esun cu kier a cancela DIARIO como e matutino di Aruba, por favor yama cancele, pasobra nos no tin EXTRA mas. Pero pueblo a comporta fantastico. Eynan bo ta mira cu pueblo Arubano tabata kier su corant pa Aruba, y skirbi door di Arubianonan. Ningun hende a manda cancela su corant".

Esaki ta nifica cu DIARIO a cuminza riba un average base



Sra. Nuhad hunto cu su esposo Sr. Jossy Mansur

di 6 pa 7 mil ehemplar.

"Tur e añanan cu nos a traha cu EXTRA e abonadonan a bay pa DIARIO. Esey a duna nos un empuhe masha grandi. Aworaki, danki Dios nos a muda di e edificio bieu, nos a bin na nos mes edificio, nos a crece pa 70 y pico empleado, y nos tur ta manera un solo famia loke pa mi ta un gran satisfaccion".

UN LUCHA DURO

Den e lucha duro cu a nifica lanta DIARIO, señora Mansur tabata traha den madrugada hunto cu Jossy, y awendia nan ta recogiendo e bon cosecha di e simia cu nan a sembra.

"Nos ta contento cu nos empleadonan ta hende leal. Nos ta stima nan tur, y nos sa cu nan ta stima nos. Nos tin empleadonan cu tin entre 17 pa 10 año caba cu nos, y tur esaki ta un estimulo pa nos".

E lucha aki tambe a haya cierto piedranan riba caminda, pero DIARIO no a trompeca cay.

"Tin hende cu a purba boicotea nos, di haci un campaña contra DIARIO, pero -que va- mientras bo ta traha cu honestidad, sinceridad y DIOS como base no tin nada pa kibramento. Pesey nos a lanta DIARIO pa Aruba y pa nos Arubianonan y pa bon di nos Isla, y logicamente como un negoshi".

SU ROL DI MAMA

Tambe ta asina cu ademas di su rol como muher di empuhe banda di Jossy Mansur como escritor y periodista, Sra. Nuhad Mansur tabata tin su responsabilidad como mama, cual e no a descuida.

"Danki Dios mi cas tabata net banda di DIARIO, loke tabata un bentaha. Nos tabata na cas ora di come, cual ta sagrado, ora nos muchanan tabata bin di school, y despues nos mester a bay traha. Den tur lucha pa sostene bo negoshi bo tin cu dividi bo mes den dos, loke mi

tambe a haci".

Sra. Mansur ta masha contento cu Dios a dune bon yiunan cu a lanta decente y ta respeta hende.

"Nan a compronde cu nos mester traha, y cu bida moderno ta existi pa ambos mayor traha. E muchanan mes ta existi hopi di nan mayornan, y aunque bo no duna nan tur cos, nos mester percura pa nan haya lo mehor".

NOS MUHERNAN ARUBANO

For di punto di bista di Sra. Nuhad Mansur, e tamaño di Aruba como pais, no ta permiti e hendenan muher Arubano lucha manera ta e caso den paisnan grandi.

"Na Aruba tur lugar ta keda cerca, mayoria di cos ta na man, bo tin bo famia rond di bo y nan ta yudabo ora bo tin un problema, y esey ta hacibo mas trankil.

Den paisnan grandi si bo no ta lucha demasiado duro bo no ta logra nada pasobra e competencia ta enorme. Mas bien mi tin hopi respet pa muhernan Arubano pasobra nan ta muhernan hogareño, bon esposa, bon mama.

Claro cu tin algun excepcion manera den tur cos, pero mayoria ta muhernan trankil, pa kendenan e hogar ta principal pa nan".

Sra. Mansur tin hopi comprension y respet pa e mamanan Arubano cu mester traha pasobra bida awendia tin hopi exigencia, y no por evita e desaroyo aki.

Sra. Nuhad Mansur ta hopi satisfecho cu su tur su personal, y como parti di dje, cu su personal femenino den cual e ta confia plenamente y ta agradecido na dje.

"Esnan mas hoben ta mescos cu si nan ta mi yiunan, y esnan mas grandi ta mescos cu si nan ta mi rumannan!", e ta bisa.

8 Maart Dia Int. di Hende Muher

*Nos Kier Felicita
Tur Muher Ariba
nan Dia
BOTICA
EAGLE*



8 Maart Dia Int. di Hende Muher

*Nos Kier Felicita
Tur Muher
Ariba nan Dia
D'Yvonne Beauty Salon
and Supplies*

